

Broj: 39/14

Datum, 26. džumade-l-uhra 1435. h.g.

26. april 2014. godine

Na osnovu člana 27. Zakona o ustanovama (*Sl. list BiH* br. 6/92, 8/93 i 13/94), člana 30. Zakona o naučnoistraživačkoj djelatnosti (*Službene novine Kantona Sarajevo* broj 10/04) i člana 62. stav 2. tačka 1. Ustava Islamske zajednice u Bosni i Hercegovini, Sabor Islamske zajednice u Bosni i Hercegovini na 9. redovnoj sjednici održanoj u Sarajevu dana 26.4.2014. donio je:

P R A V I L A

INSTITUTA ZA ISLAMSKU TRADICIJU BOŠNJAKA

I – OSNOVNE ODREDBE

Član 1.

Ovim Pravilima uređuje se naziv i sjedište Instituta, osnivač, djelatnost, način i uvjeti obavljanja djelatnosti, organi upravljanja i rukovođenja Institutom, unutrašnja organizacija i sistematizacija, radni odnosi, organizacija naučnog i stručnog rada, način stjecanja i raspoređivanja sredstava za rad, statusne promjene, način ostvarivanja javnosti rada i druge odredbe od značaja za rad Instituta.

Član 2. (Definicija)

Institut za islamsku tradiciju Bošnjaka (u daljem tekstu: Institut) je naučnoistraživačka ustanova Rijasetu Islamske zajednice u Bosni i Hercegovini koja se bavi naučnoistraživačkim radom.

Član 3. (Naziv)

Naziv ustanove je: Islamska zajednica u Bosni i Hercegovini, Institut za islamsku tradiciju Bošnjaka.

Skraćeni naziv ustanove je: Institut za islamsku tradiciju Bošnjaka.

Član 4. (Sjedište)

Sjedište Instituta je u Sarajevu, Gazi Husrev-begova 56A.

Odluku o promjeni naziva i sjedišta Instituta donosi Upravni odbor uz saglasnost Rijasetu Islamske zajednice u BiH.

Član 5.
(Pravni subjektivitet)

Institut ima svojstvo pravnog lica.

Član 6
(Upis u registar)

Institut je upisan u Registar za Islamsku zajednicu u Bosni i Hercegovini kod Ministarstva pravde Bosne i Hercegovine i Registar Ministarstva za obrazovanje, nauku i mlade Kantona Sarajevo.

Član 7.
(Pečat i memorandum)

Institut ima pečat i memorandum.

Član 8.
(Pečat)

Institut u svom radu upotrebljava službene pečate promjera 45 mm i 20 mm s ispisanim tekstom na bosanskom, arapskom i engleskom jeziku:

- Islamska zajednica u Bosni i Hercegovini
- Institut za islamsku tradiciju Bošnjaka

Svi natpisi su ispisani u koncentričnim nezavršenim krugovima na čijim se krajevima nalazi zaštitni znak Islamske zajednice u Bosni i Hercegovini.

Institut u radu, također, upotrebljava i četvrtaste pečate i to:

Jedan pečat dimenzija 70x40 mm s ravno ispisanim tekstom na bosanskom, arapskom i engleskom jeziku:

Prvi red: Islamska zajednica u Bosni i Hercegovni

Drugi red: Institut za islamsku tradiciju Bošnjaka

Drugi pečat dimenzija 60x30 mm s ravno ispisanim tekstom na bosanskom jeziku:

Prvi red: Islamska zajednica u Bosni i Hercegovni

Drugi red: Institut za islamsku tradiciju Bošnjaka

Treći red: Broj: _____ primljeno dana _____ sa priloga _____

Član 9.

Za izradu pečata Instituta nadležan je Rijaset Islamske zajednice u BiH.

Član 10.
(Memorandum)

Institut u svom radu koristi memorandum u čijem je zaglavlju ispisan tekst:

Islamska zajednica u Bosni i Hercegovini

Logo Instituta za islamsku tradiciju Bošnjaka

Institut za islamsku tradiciju Bošnjaka

Tekst memoranduma može biti ispisan na bosanskom, arapskom, turskom, engleskom i njemačkom jeziku.

U podnožju memoranduma ispisani su podaci za kontakte s Institutom.

Član 11.
(Zaštitni znak)

Institut na svom memorandumu može dodatno koristiti i vlastiti zaštitni znak.

II – OSNIVAČ INSTITUTA I NJEGOV PRAVNI POLOŽAJ

Član 12.
(Osnivač)

Osnivač Instituta je Sabor Islamske zajednice u BiH.
Prava i obaveze u ime osnivača vršit će Rijaset Islamske zajednice u BiH (u daljem tekstu: Osnivač).

Sabor Islamske zajednice u BiH ostaje nadležan za donošenje Pravila Instituta te usvajanje njegovih izmjena i dopuna.

Član 13.
(Nadležnosti Osnivača)

Nadležnosti Osnivača su:

- donesi odluku o pokretanju i prestanku rada Instituta,
- daje mišljenje na prijedlog izmjena i dopuna pravila,
- imenuje članove i predsjednika Upravnog odbora Instituta,
- daje saglasnost na imenovanje i razrješenje direktora Instituta,
- odlučuje o raspolaganju imovinom Instituta u slučaju prestanka njegovog rada,
- vrši nadzor nad radom Instituta.

Član 14.
(Odgovornost)

Institut ima svojstvo pravnog lica, ustanove Rijaset Islamske zajednice u BiH i u pravnom prometu istupa samostalno, a za svoje obaveze odgovara sredstvima kojima raspolaže.

III – DJELATNOST INSTITUTA

Član 15.
(Djelatnost)

Institut se bavi naučnoistraživačkom djelatnošću iz oblasti islamske tradicije Bošnjaka.
Područje djelatnosti Instituta obuhvata proučavanje pisane i usmene, duhovne i materijalne tradicije Bošnjaka kao i proučavanje aktuelne društvene i kulturne stvarnosti Bošnjaka.

Pored osnovne, Institut se može baviti izdavačkom i drugim djelatnostima koje su u vezi s osnovnom djelatnošću Instituta.

Član 16.
(Naučnoistraživački rad)

Naučnoistraživački rad podrazumijeva otkrivanje novih i korištenje postojećih znanja iz oblasti islamske tradicije Bošnjaka.

Naučnoistraživački rad obuhvata fundamentalna istraživanja u navedenoj oblasti.

Rezultati naučnoistraživačkog rada moraju da sadrže elemente izvornosti i novosti, a vrednuju se objavljivanjem u naučnim ili drugim publikacijama ili na drugi način propisan ovim pravilima.

IV- ZADACI INSTITUTA

Član 17.
(Zadaci)

Institut ostvaruje zadatke utvrđene zakonom i ovim pravilima a naročito:

- organizira istraživanja u oblasti islamske tradicije Bošnjaka,
- ugovara naučna i stručna istraživanja,
- organizira izdavačku djelatnost knjiga i periodičnih publikacija, internet izdanja, časopisa i drugih izdanja samostalno i u suizdavaštvu s drugim institucijama,
- organizira i saorganizira naučne skupove, savjetovanja, diskusije i predavanja o pojedinim naučnim i stručnim pitanjima iz djelokruga rada Instituta i srodnih djelatnosti
- radi na usavršavanju metodologije i stručnog rada iz svoje djelatnosti,
- pruža pomoć naučnim i stručnim saradnicima u istraživanju,
- razvija saradnju s naučnim i stručnim ustanovama u zemlji i inozemstvu,
- vrši promociju i prodaju sopstvenih izdanja te izdanja u suizdavaštvu s drugim institucijama,
- obavlja i druge poslove i zadatke utvrđene zakonom i općim aktima Instituta.

V- ORGANI INSTITUTA

Član 18.
(Organi)

Organi Instituta su:

- Organ upravljanja – Upravni odbor
- Organ rukovođenja – Direktor
- Organ kontrole poslovanja – Nadzorni odbor
- Stručni organ – Naučno vijeće

Član 19.
(Upravni odbor)

Upravni odbor broji pet članova koje imenuje Osnivač na period od četiri godine s mogućnošću imenovanja na još jedan mandat

Dva člana Upravnog odbora imenuju se iz reda zaposlenih u Institutu s naučnim ili istraživačkim zvanjem.

Direktor Instituta ne može biti član Upravnog odbora.

Član 20.
(Nadležnosti Upravnog odbora)

Upravni odbor:

- utvrđuje prijedlog pravila Instituta,
- imenuje i razrješava direktora uz saglasnost Osnivača,
- utvrđuje planove rada i razvoja,
- donosi Pravilnik o radu Upravnog odbora,
- imenuje konkursne komisije za izbor zaposlenika,
- na prijedlog direktora odobrava angažman spoljnih saradnika;
- utvrđuje godišnji program rada,
- usvaja finansijski plan i godišnji obračun,
- donosi opći akt o unutrašnjoj organizaciji i sistematizaciji poslova i druge opće akte u skladu sa zakonom i pravilima Instituta,
- odlučuje o svim pitanjima obavljanja djelatnosti radi kojih je Institut osnovan izuzev pitanja koja su u nadležnosti Naučnog vijeća Instituta,
- usmjerava, kontrolira i ocjenjuje rad direktora,
- rješava sva pitanja odnosa s Osnivačem,
- odlučuje kao drugostepeni organ po prigovoru zaposlenika na pojedinačne akte o pravima, obavezama i odgovornosti,
- podnosi Osnivaču godišnji izvještaj o poslovanju Instituta,
- imenuje Naučno vijeće na prijedlog direktora,
- vrši i druge poslove u skladu sa zakonom i pravilima Instituta.

Član 21.
(Rad Upravnog odbora)

Rad Upravnog odbora regulira se Pravilnikom o radu.

Član 22.
(Direktor)

Za direktora Instituta može biti imenovan naučni radnik koji ima doktorat iz oblasti islamskih, društvenih ili humanističkih nauka, zvanje naučnog saradnika, višeg naučnog saradnika ili naučnog savjetnika te potrebne moralne i organizacijske sposobnosti.

Pored uvjeta iz stava 1. ovog člana kandidat za direktora mora ispunjavati i sljedeće uvjete:

- da je rukovodio naučnoistraživačkim projektima,
- da ima razvijene rukovodeće sposobnosti.

Član 23.
(Imenovanje direktora)

Direktora Instituta, na osnovu javnog konkursa, imenuje i razrješava Upravni odbor uz saglasnost Osnivača.

Mandat direktora Instituta je četiri godine s mogućnošću imenovanja na još jedan mandat.

Član 24.
(Razrješenje direktora)

Upravni odbor Instituta može razriješiti direktora i prije isteka mandata na koji je imenovan:

- ako utvrdi da je odgovoran za neuspješan ili nezakonit rad Instituta,
- na lični zahtjev,
- u drugim slučajevima utvrđenim zakonom.

Član 25.
(Vršilac dužnosti direktora)

Ukoliko direktor nije imenovan ili je razriješen dužnosti iz razloga propisanih članom 24. ovih pravila, Upravni odbor će imenovati vršioca dužnosti iz reda zaposlenika.

Vršilac dužnosti može biti imenovan do imenovanja direktora a najduže šest mjeseci.

Vršilac dužnosti ima sva prava, obaveze i ovlaštenje direktora.

Član 26.
(Nadležnosti direktora)

Direktor Instituta:

- organizira i rukovodi radom Instituta,
- predlaže Naučnom vijeću izbor predsjedavajućeg Naučnog vijeća,
- učestvuje u radu Naučnog vijeća,
- zastupa Institut prema trećim licima i odgovoran je za zakonitost rada Instituta,
- predlaže Upravnom odboru strategije razvoja Instituta,
- predlaže Upravnom odboru plan rada i finansijski plan Instituta,
- predlaže Upravnom odboru mjere za efikasno i zakonito obavljanje djelatnosti Instituta,
- predlaže Upravnom odboru unutrašnju organizaciju i sistematizaciju poslova Instituta,
- predlaže Upravnom odboru angažman spoljnih saradnika,
- donosi odluku o izboru zaposlenika na prijedlog konkursne komisije,
- odlučuje o pravima, obavezama i odgovornosti zaposlenika Instituta,
- prisustvuje sjednicama Upravnog odbora,
- izvršava odluke Upravnog odbora,

- preduzima mjere za sprovođenje politika, strategija i plana poslovanja,
- vodi brigu o savjesnom korištenju imovine Instituta,
- daje ovlaštenje za predstavljanje Instituta prema trećim licima,
- naredbodavac je za izvršenje finansijskog plana,
- predlaže Upravnom odboru opće akte iz domena rada Instituta,
- podnosi izvještaje o finansijskom poslovanju i izvještaj o radu,
- vrši i druge poslove u skladu sa zakonom i Ustavom Islamske zajednice u BiH.

Član 27.
(Nadzorni odbor)

Nadzorni odbor ima tri člana koje imenuje Osnivač.

Jedan član Nadzornog odbora je iz reda zaposlenih u Institutu.

Predsjednik i članovi Nadzornog odbora imenuju se za period od četiri godine uz mogućnost imenovanja na još jedan mandat.

Do imenovanja članova Nadzornog odbora osnovne djelatnosti Nadzornog odbora obavljat će nadležna služba Rijasetu Islamske zajednice u BiH.

Član 28.
(Nadležnosti Nadzornog odbora)

Nadzorni odbor:

- analizira izvještaje o poslovanju Instituta,
- u obavljanju nadzora nad upotrebom sredstava za rad, pregleda godišnji izvještaj o poslovanju i godišnji obračun,
- pregleda i provjerava urednost i zakonitost vođenja poslovnih knjiga,
- izvještava Osnivača, Upravni odbor i direktora o rezultatima nadzora.

Član 29.
(Naučno vijeće)

Naučno vijeće je naučni stručni organ Instituta sastavljen od najmanje pet članova.

Naučno vijeće u pravilu čine zaposlenici Instituta s naučnim stepenom doktora nauka.

Naučno vijeće može imati i članove spoljne saradnike koji imaju naučni stepen doktora nauka.

Angažman spoljnih saradnika na prijedlog direktora odobrava Upravni odbor Instituta.

Član 30.
(Rad Naučnog vijeća)

Rad Naučnog vijeća regulira se Pravilnikom o radu.

Član 31.
(Nadležnosti Naučnog vijeća)

Naučno vijeće:

- na prijedlog direktora imenuje predsjedavajućeg vijeća,

- utvrđuje programe naučnoistraživačkog rada na prijedlog direktora i prati njihovo ostvarivanje,
- na prijedlog direktora usvaja naučnoistraživačke projekte, daje odgovarajuće smjernice i ocjenjuje kvalitet ostvarenih projekata,
- vrši izbor u naučna i istraživačka zvanja,
- utvrđuje izdavačku politiku Instituta,
- vrši i druge poslove propisane zakonom.

Član 32.
(Unutrašnja organizacija)

U izvršavanju zadataka i obavljanju poslova iz svog djelokruga rada, Institut ima sljedeće organizacione jedinice:

1. Odjeljenje naučne obrade
2. Sekretarijat

Član 33.
(Odjeljenje naučne obrade)

Odjeljenje naučne obrade se bavi sustavnim teorijskim i empirijskim istraživanjem islamske tradicije Bošnjaka.

Član 34.
(Sekretarijat Instituta)

Sekretarijat Instituta se bavi:

- upravno-pravnim, administrativnim i općim poslovima,
- pripremom nacрта općih akata, izradom rješenja i odluka koje donose organi Instituta,
- izradom izvještaja o radu,
- drugim poslovima po nalogu direktora.

VI ORGANIZACIJA NAUČNOG I STRUČNOG RADA, VERIFICIRANJE I OBJAVLJIVANJE REZULTATA NAUČNOG RADA

Član 35.
(Program naučnog i stručnog rada)

Osnov za organiziranje naučnog i stručnog rada Instituta čine potrebe Islamske zajednice i javni natječaji za naučnoistraživačke projekte.

Naučni i stručni rad u Institutu obavlja se na osnovu godišnjeg programa rada Instituta.

Program rada sadrži kolektivne i individualne zadatke, naziv teme, autora i rok izvršavanja zadataka.

Član 36.
(Naučni i stručni zadaci)

Naučni i stručni zadaci obavljaju se na osnovu studijskog projekta.

Naučno vijeće i direktor utvrđuju konkretne radne zadatke stručnim saradnicima Instituta.

Nosilac radnog zadatka podnosi Naučnom vijeću izvještaj o radu na određenom zadatku krajem tekuće godine.

Po završenom radnom zadatku nosilac radnog zadatka predaje rad direktoru koji s tim upoznaje Naučno vijeće Instituta.

Predajom rukopisa i pozitivnim recenzijama smatra se da je radni zadatak završen.

Studijski projekat radi nosilac radnog zadatka, odnosno grupa saradnika ako se projekat izvodi timski.

Studijski projekat razmatra i usvaja Naučno vijeće Instituta.

Član 37.
(Objavljivanje rezultata naučnog rada)

Institutu kao poslodavcu pripada isključivo pravo na objavljivanje i korištenje svih naučnih i stručnih radova kao autorskih djela naučnih saradnika rađenih u organizaciji ili po uputstvima Instituta, u trajanju od pet godina od dana završetka djela, u skladu sa Zakonom o autorskom i srodnim pravima u Bosni i Hercegovini.

Član 38.

Nakon proteka roka od pet godina od završetka autorskog djela nastalog u organizaciji ili po uputstvu Instituta, pravo na korištenje djela pripada isključivo autoru.

Autor djela iz prethodnog stava ovog člana u slučaju objavljivanja svojih sabranih djela može i bez dozvole Instituta koristiti to djelo.

Član 39.

Sve pozitivno ocijenjene naučne i stručne radove Institut će po pravilu objaviti, a ukoliko to nije u mogućnosti, Institut će preuzeti, registrirati i dati na korištenje kao autorizirane radove.

Član 40.

Naučne i stručne radove koje Institut ne može objaviti autori mogu, po odobrenju Upravnog odbora, publicirati izvan Instituta.

Član 41.
(Izdavačka politika)

Izdavačku politiku Instituta vodi Naučno vijeće.

Naučno vijeće Instituta u ulozi izdavačkog savjeta:

- utvrđuje trajnije koncepcije izdavačke djelatnosti Instituta,
- utvrđuje godišnji plan izdavačke djelatnosti Instituta,
- imenuje redakcije pojedinih izdanja Instituta,
- utvrđuje recenzente pojedinih publikacija.

Član 42.

Svaka publikacija Instituta ima svoju redakciju koja u okviru programa izdavačke djelatnosti određuje koncept publikacije i uređuje je.

Član 43.

Članovi redakcija publikacija Instituta biraju se na period od dvije godine. Urednici mogu biti ponovno birani u istu redakciju.

Član 44.

Za svaku publikaciju pored recenzije odgovornog urednika pribavit će se najmanje još dvije anonimne recenzije.

Član 45.

Bliže propise o načinu objavljivanja naučnih i stručnih radova i reguliranje autorskih prava donosi Upravni odbor Instituta u skladu s postojećim propisima iz te oblasti.

VII RADNI ODNOSI

Član 46.

Radni odnosi zaposlenika, prava, obaveze i odgovornosti iz radnog odnosa uređuju se Pravilnikom o radu.

VII NAUČNICI I ISTRAŽIVAČI

Član 47. **(Naučnici i istraživači)**

Naučnoistraživački rad obavljaju naučnici i istraživači izabrani u naučna i istraživačka zvanja na Institutu i drugim naučnoistraživačkim ustanovama te naučnici izabrani u naučno-nastavna zvanja na visokoobrazovnim ustanovama.

Član 48. **(Naučna zvanja)**

Naučna zvanja u smislu člana 47. ovih pravila su:

- naučni saradnik,
- viši naučni saradnik,
- naučni savjetnik.

Član 49. **(Istraživačka zvanja)**

Istraživačka zvanja u smislu člana 47. ovih pravila su:

- stručni saradnik,
- viši stručni saradnik,
- stručni savjetnik.

Član 50. **(Uvjeti izbora u naučna i istraživačka zvanja)**

Uvjeti izbora u naučna i istraživačka zvanja regulira posebnim Pravilnikom o izboru u naučna i istraživačka zvanja.

VIII ZAŠTITA NAUČNOG FONDA I DOKUMENTACIONOG MATERIJALA U SLUČAJU ELEMENTARNIH NEPOGODA, ZA VRIJEME RATNOG STANJA ILI U SLUČAJU NEPOSREDNE RATNE OPASNOSTI

Član 51.

(Komisija za zaštitu naučnog fonda i dokumentacionog materijala)

U slučaju elementarnih nepogoda, za vrijeme ratnog stanja ili u slučaju neposredne ratne opasnosti imenuje se komisija za zaštitu naučnog fonda i dokumentacionog materijala.

Komisiju iz prethodnog stava ovog člana imenuje Upravni odbor iz reda naučnih radnika i saradnika i utvrđuje rokove za izvršenje zadataka.

Komisija ima pet članova.

Član 52.

(Zadaci komisije)

Komisija je dužna da naučni i dokumentacioni materijal smjesti na odgovarajući način i pohrani na sigurno mjesto.

IX FINANSIRANJE DJELATNOSTI INSTITUTA

Član 53.

(Sredstva za rad)

Institut osigurava sredstva za rad iz budžeta Osnivača, obavljanjem poslova iz registriranih djelatnosti, donacija i iz drugih izvora.

Član 54.

(Prihodi)

Institut može stjecati prihode:

- realizacijom naučnoistraživačkog rada,
- pružanjem i prodajom intelektualnih, kulturnih i materijalnih usluga i dobara;
- iz legata, poklona i vakufa,
- od donacija,
- od prodaje vlastitih izdanja: knjiga i časopisa,
- iz drugih izvora u skladu sa zakonskim propisima.

Član 55.

Novčana sredstva Instituta vode se na računu poslovne banke, u skladu s važećim propisima, a knjigovodstveno se posebno prikazuju:

- sredstva iz budžeta Osnivača;
- vlastiti prihodi.

Član 56.

(Naredbodavac za izvršenje budžeta)

Naredbodavac za izvršenje budžeta je direktor u granicama utvrđenim zakonom i ovim pravilima.

X – JAVNOST RADA I POSLOVNA TAJNA

Član 57.

(Javnost rada)

Rad Instituta je javan.

Javnost rada Instituta osigurava se: objavljivanjem naučnih i stručnih radova u stalnim i povremenim publikacijama, stavljanjem na korištenje dokumentacije Instituta ustanovama i građanima koji se bave proučavanjem islamske tradicije Bošnjaka te obavještavanjem zaposlenika i javnosti o cjelokupnom poslovanju Instituta.

Član 58.

(Informiranje zaposlenika)

Zaposlenici Instituta imaju pravo da budu informirani o radu i izvršavanju odluka organa Instituta.

Član 59.

(Poslovna tajna)

Zaposlenici Instituta su obavezni da čuvaju poslovnu tajnu.

Odluku o podacima i aktima koji se smatraju poslovnom tajnom donosi Upravni odbor Instituta.

XI – DONOŠENJE OPĆIH AKATA

Član 60.

(Opći akti)

Opće akte donosi Upravni odbor na prijedlog direktora a objavljuju se najdalje tri dana od njihovog donošenja na oglasnoj tabli Instituta.

Član 61.

Pored pravila Institut ima i sljedeće opće akte:

- Pravilnik o radu,
- Pravilnik o unutrašnjoj organizaciji i sistematizaciji radnih mjesta,
- Pravilnik o izboru u naučna i istraživačka zvanja,
- Pravilnik o plaćama i naknadama,
- Pravilnik o finansijskom poslovanju, organizaciji i načinu vođenja knjigovodstva,
- Pravilnik o zaštiti od požara,
- Pravilnik o arhivskom i kancelarijskom poslovanju,
- Pravilnik o izdavačkoj i publicističkoj djelatnosti.

XII – PRIJELAZNE I ZAVRŠNE ODREDBE

Član 62.

(Prijelazne odredbe)

Stupanjem na snagu ovih Pravila, prestaju da važe odredbe Statuta broj: SIZ-79/08 od 05. novembra 2008. godine.

Član 63.

U roku od 180 dana od dana stupanja na snagu ovih pravila, donijet će se akti iz člana 61. ovih pravila.

Član 64.

U slučaju prestanka s radom, Osnivač će donijeti odluku o daljnjem raspolaganju imovinom Instituta koja je preostala nakon što se izmire sve obaveze.

Član 65.

(Izmjene i dopune)

Izmjene i dopune ovih pravila donosi Sabor Islamske zajednice u BiH, na prijedlog Upravnog odbora Instituta i uz mišljenje Rijaseta Islamske zajednice u BiH.

Član 66.

(Stupanje na snagu)

Ova pravila stupaju na snagu danom donošenja i objavit će se u Glasniku Rijaseta Islamske zajednice.



Predsjednik Sabora

Safet Softić